

河南通志

河南通志卷之五十五

名宦中

開封府

〔漢〕薛宣字贛君東海鄒人成帝時陳留太守盜賊潛藏吏民服其威信

樂俊光武時爲浚儀令時陽武令張汜上言河決積久宜改修堤防俊以新被兵革瘡痍未復奏止之王况京兆人光武時爲陳留太守務行德教時蝗大起過郡界不留歲大熟

魯恭字仲康扶風平陵人明帝時爲中牟令專以德禮化民不任刑罰吏人信服郡國螟蝗爲災傷禾稼

獨不入中牟河南尹袁安聞之疑其不實使掾肥親
往廉之恭隨行阡陌俱坐桑下有雉過止其旁旁有
童兒親曰兒何不捕之兒言雉將雛親瞿然而起與
恭訣曰所以來者欲察君之政迹耳今蟲不犯境一
異也化及鳥獸二異也豎子有仁心三異也久留徒
擾賢者耳還府具以狀白安是歲嘉禾生恭便坐庭
中安上書言狀帝異之

召馴字伯春九江壽春人信臣孫章帝時拜陳留太
守有治迹賜刀劍錢物元和二年入爲河南尹

馬嚴字威卿扶風茂陵人建初二年拜陳留太守明
賞罰發奸慝郡界清甯時京師訛言賊從東方來百

姓奔走諸郡惶急各以狀聞嚴察其虛妄獨不爲備
詔書勅問嚴嚴白無賊後卒如言

劉矩字叔方沛國蕭人桓帝時爲雍邱令以禮讓化
人其無孝義者皆感悟自革民有爭訟矩引之前提
耳訓告以爲忿恚可忍縣官不可入使歸更尋思訟
者輒各罷去有路得遺物者皆推尋其主還之在縣
四年以母憂去

棗祗潁川人獻帝末爲陳留太守時歲旱軍食不足
祗建置屯田數年中歲每大收所在積粟倉廩皆滿
軍國賴之

三國司馬岐河內溫人魏明帝時爲陳留相梁郡有繫

囚多所連及數歲不決詔書徙獄於岐屬縣請預治
牢具岐曰今囚有數十既巧詐難符且已倦楚毒其
情易見豈當復久處囹圄邪及囚至詰之皆莫敢匿
一朝決竟隨超爲廷尉

劉劭字孔才邯鄲人魏明帝時爲陳留太守敦崇教
化百姓稱之

晉陸雲字士龍吳郡人太安間爲浚儀令縣居都會之
要名爲難理雲到官肅然下不能欺市無二價人有
見殺者主名不得雲錄其妻而無所問十許日遣出
密令人尾之謂曰其去不出十里當有男子候之與
語便縛來旣而果然問之具服云與此妻通共殺其

夫聞妻得出欲與語憚近縣故遠相要候于是一縣
頌其神明及去官百姓圖像配食縣社

南北朝張代字定燕上谷人元魏太武帝時爲陳留太
守著清稱

唐李道廣京兆萬年人武后時爲汴州刺史有善政突
厥契丹擾河北議發河南兵擊之百姓震擾道廣悉
心撫定人無離散遷殿中監

馮元淑相州安陽人中宗時爲浚儀令右善去惡人
稱爲神明與奴僕日一食馬日一秣不挈妻子斥俸
餘以給貧窮或譏其近名元淑曰吾性也不爲苦帝
降璽書勞勉付狀史官

倪若水字子泉恒州藁城人開元初爲汴州刺史政
尙清靜增修孔子廟興州縣學廬勸生徒身爲教誨
風化興行帝遣中人捕鵠鵲鵲鵠于南方若水上言
農方田婦方蠶請止之帝手詔褒荅悉放所玩謫使
者過取罪而賜若水帛四十段

齊澣字洗心定州義豐人開元中爲汴州刺史地當
舟車輳集事浩繁前刺史數不稱職惟倪若水與澣
以清毅聞吏民頌美

陸景倩蘇州吳縣人元宗時爲扶溝丞河南按察使
畢構覆州縣最欲必得實有吏言狀曰某強清某詐
清惟景倩曰真清

五代薛居正字子平浚儀人漢乾祐初署開封府判官
時史宏肇領侍衛親軍威權震主殘忍自恣無敢忤
者其部下吏告民犯鹽禁法當死居正疑其不實召
詰之乃吏與民有私憾因誣之逮吏鞠之具伏抵法

〔宋〕吳廷祚字慶之并州太原人太祖時以樞密使判開
封府與李筠戰於澤州南破其衆及討李重進又爲
東京留守建隆三年以功轉雄武軍節度使
宋琪字叔寶幽州薊人乾德中爲開封府推官有治
績時太宗爲府尹甚加禮遇後爲通判府事京府置
通判自琪始

程羽字冲遠深州陸澤人開寶中判開封府羽性淳

厚蒞任恪謹時太宗尹京頗以長者稱之及卽位拜給事中知開封府

呂餘慶以字行幽州安次人初太祖領同州節制聞餘慶有材奏爲從事及太宗歷滑許宋三鎮餘慶並爲賓佐旣卽位自宋毫觀察判官召拜給事中未幾知開封府餘慶所至秉正不阿臨事有斷至道中以弟端爲宰相特詔贈侍中

竇偁字曰章薊州漁陽人開寶六年爲開封府判官時太宗領開封尹賈琬爲推官偁不樂其爲人太宗嘗宴諸王偁琬與會琬言矯誕偁叱之曰巧言令色心獨不愧乎上愕然因罷會出偁爲彰義軍節度判

官

張詠字復之鄆城人太宗時知浚儀縣有才望治蹟
李沆宋湜寇準連薦於朝爲轉運使後以抗論丁謂
王欽若知陳州

李穆字孟雍陽武人太宗時知開封府剖判精敏豪
右屏迹無敢干以私者帝知其才擢爲諫議大夫
王彬固始人淳化間爲雍邱尉時皇城司陰遣人
畿縣刺事多厲民彬捕鞠之得所受賂致之法自是
詔親事官毋得出都城

樂黃目撫州宜黃人咸平間知浚儀縣上言知州縣
令引見御前試時務策取其明于吏治達于教化者

充選則官得其人矣後權開封府持正奉法吏民畏而愛之

林從周海陽人景德初爲開封府推官痛絕私謁莊獻太后知其名甚禮重之民有殺其兄之二子以竄其財者長被劄卽死其幼走免事發獄成以母年八十法當留侍從周議使無狀子居側以凌其幼孤必無全理且孤孫雖穉亦能爲祖母養留之長姦不可讀奏未畢太后可之從周持平固執皆類此

梁灝鄆城人景德初以翰林學士權知開封府子直亦權開封府又知鄭州有風采明於法令教條嚴不可犯

慎從吉字慶之衢州信安人祥符初以給事中權知
開封府請囑一無所受後坐子鈞事免

魯宗道譙人祥符五年知中牟縣有惠政以剛直稱
官至參知政事人呼爲魚頭參政

石揚休字昌言睢州人真宗時知中牟縣縣當國西
門衣冠往來之衝地瘠民貧賦役煩重富人隸太常
爲樂工僥倖免役者凡六十餘家揚休請悉罷之

龐籍字醇之單州武城人真宗時爲開封府判官尙
美人遣內侍稱勅旨免工人市租籍言祖宗以來未
有美人稱勅旨下府者於是詔有司自今宮中傳命
毋得輒受

李載字伯熙黎陽人真宗時知祥符縣有巫以井泉飲人云可愈疾趨者旁午載杖巫堙其井以治聞徙知虢州漣水軍

周起字萬卿淄州鄒平人真宗時以樞密直學士權知開封府聽斷明審舉無留事帝嘗臨幸問勞

薛奎字宿藝絳州正平人真宗時以龍圖閣待制權知開封府爲政嚴敏擊斷無所貸帝重之

呂夷簡字坦夫壽州人真宗時權知開封府爲治嚴辨有聲帝識姓名于屏風將大用之仁宗卽位以武勝軍節度使判陳州子公綽公孺相繼知開封

府

范仲淹字希文蘇州吳縣人舉進士以吏部員外郎
權知開封府決事如神京師謠曰朝廷無憂有范君
京師無事有希文時呂夷簡當國進用者多出其門
仲淹上百官圖指其次第謂如此爲序次如此爲不
次如此爲公如此爲私語侵夷簡夷簡不悅又論建
都謂洛陽險固而汴爲四戰之場太平宜居汴卽有
事必居洛陽夷簡目爲迂濶仲淹復譏切時政益與
夷簡忤罷知饒州會元昊反置陝西路安撫經略招
討使以仲淹韓琦龐籍分領之號令明肅賊不敢犯
呼爲龍圖老子謂其胸中有數萬甲兵又謠曰軍中
有一韓西賊聞之盡膽寒軍中有一范西賊聞之盡

喪膽元昊由此請和遂召拜樞密副使改參知政事
程琳字天球博野人眞宗時以給事中權知開封府
王蒙正子齊雄捶老卒死賂妻子使以病告琳察其
色辭異令有司驗得其捶死狀蒙正連姻章獻太后
家太后謂琳曰齊雄非殺人者乃其奴捶之琳曰奴
無自專理且使令與已犯同太后默然遂論如法
陳堯佐字希元閬中人仁宗時與弟堯咨相繼知開
封府皆有政績

錢明逸京兆人仁宗時知開封府謹守繩墨爲政簡
靜有條理不肯徇私

燕度字唐卿青州益都人仁宗時知陳留縣京東蝗

年饑盜起度勸邑豪出粟六萬以濟民又行保伍法以察盜善狀日聞以薦徙知溫州

鄭戢字天休蘇州吳縣人寶元初以龍圖閣直學士權知開封府彊敏善聽決假貸細民繩治豪右政有能迹徙擢三司使

魏瓘字用之婺源人仁宗時知開封府持法精審明通吏事上元起綵山闕前張燈與宦者護作宦者挾氣視瓘年少輒誅索侵擾瓘密以聞詔杖宦者遣之弟琰嘗通判陳州適歲饑百姓相率強取人粟坐死者甚衆琰曰此迫於窮饑豈得已者坐其首鯨之強至仁宗時爲開封府倉曹叅軍郡中露積油幕一

夕火主守者法應死至疑火所起召幕工訊之工言製幕須雜他藥相因旣久得濕則燔爲上其事帝聞乃悟曰頃歲先帝山陵火起油衣其事正爾遂原其罪

榮諲字仲思濟州任城人仁宗時爲開封府判官太康民事浮屠法相聚祈禳號白衣會縣捕數十人送府尹賈黯疑有妖請殺其爲首者而流其餘諲持不從各具議上之中書是諲議但流其首餘皆杖釋之包拯字希仁廬州合肥人仁宗時權知開封府舊制凡訟訴不得徑造庭下拯開正門使得至前陳曲直吏不敢欺中官勢族築園榭侵惠民河以故河塞不